



**HOTUBA YA WAZIRI WA NCHI, OFISI YA RAIS, MENEJIMENTI YA UTUMISHI WA UMMA NA UTAWALA BORA, MHE. GEORGE SIMBACHAWENE (MB), KWENYE MAKABIDHIANO YA MFUMO WA KIELETRONI WA USIMAMIZI WA KESI (CMIS) PAMOJA NA TOVUTI, KWA OFISI YA TAIFA YA MASHTAKA DODOMA**

**TAREHE 23 AGOSTI, 2023.**

*Mhe. Pauline Philipo Gekul (Mb); Naibu Waziri Katiba na Sheria,*

*Ndg. Mary Gasper Makondo; Katibu Mkuu, Wizara ya Katiba na Sheria,*

*Ndg. Xavier Daudi; Naibu Katibu Mkuu Ofisi ya Rais, Menejimenti ya Utumishi wa Umma,*

*Ndg. Sylvester Mwakitalu; Mkurugenzi wa Mashitaka (DPP),*

*Eng. Benedict Ndomba; Mkurugenzi Mkuu wa Mamlaka ya Serikali Mtandao,*

*Ndg. Javelin Rugaihuruza; Kaimu Naibu Mkurugenzi wa Mashtaka,*

*Ndg. Priscus Kiwango; Mkurugenzi wa TEHAMA Serikalini, Ofisi ya Rais, Menejimenti ya Utumishi wa Umma na Utawala Bora,*

*Prof. Aloys Mvuma; Mjumbe wa Bodi ya Mamlaka ya Serikali Mtandao (e-GA),*

*Viongozi na Watumishi wa Ofisi ya Taifa ya Mashitaka (NPS) na Mamlaka ya Serikali Mtandao (e-GA),*

*Waandishi wa habari,*

*Mabibi na Mabwana;*

***Nawasalimu kwa Jina la Jamhuri ya Muungano wa Tanzania,***

Awali ya yote, napenda kumshukuru Mwenyezi Mungu mwingi wa Rehema kwa kutupa uzima na afya njema na kutuwezesha kukutana katika siku hii adhim. Kwa heshima kubwa nakushukuru sana **Mhe. Pauline Philipo Gekul (Mb)** Naibu Waziri Katiba na Sheria, kwa kuona umuhimu wa tukio hili na kutumia muda wako kujumuika nasi hii leo ikiwa ni sehemu ya jitihada za Wizara yako za kukuza na kuimarisha Serikali Mtandao kupitia Ofisi ya Taifa ya Mashtaka.

Aidha, nawashukuru viongozi wakuu wa Taasisi hizi mbili, ambao ndiyo wametufanya sisi sote tukutane hapa, ambao ni **Ndg. Sylvester Mwakitalu** Mkurugenzi wa Mashitaka (DPP) na **Eng. Benedict Ndomba**, Mkurugenzi Mkuu Mamlaka ya Serikali Mtandao (e-GA) kwa ushirikiano wao na kufanya kazi pamoja kwa ajili ya kuimarisha jitihada za Serikali Mtandao. Natambua kuwa, viongozi hawa hawawezi kufanikiwa pasipokuwa na wasaidizi mahiri kwa maana ya Menejimenti na Watumishi, ambao nao nitumie fursa hii kuwapongeza na kuwashukuru kwani kujitoa kwao ndiko kumepelekea kukamilika kwa kazi mbalimbali, ikiwemo ujenzi wa Mfumo huu.

Mwisho kabisa lakini si kwa umuhimu, nawashukuru Ndugu zangu wanahabari kwani ninyi mmekuwa mabalozi wazuri wa kuifikishia jamii ya Watanzania kazi

nzuri zinazofanywa na Serikali ya Awamu ya Sita chini ya uongozi mahiri wa Amiri Jeshi wetu, ***Rais wa Jamuhuri ya Muungazo wa Tanzania, Mh. Dr. Samia Suluhu Hassan***. Ni Imani yangu kuwa mtaendelea na jitihada hizi za kuitangaza vyema nchi yetu, hususan malengo ya Serikali ya Awamu ya Sita ya kuwezesha matumizi ya TEHAMA katika kuboresha utendaji kazi wa Taasisi za Umma na utoaji wa huduma kwa umma.

### **Ndugu Wageni Waalikwa,**

Dira ya Taifa ya Maendeleo ya 2025 na Mpango wa Taifa wa Maendeleo wa Miaka Mitano (2021/22 - 2025/26), yote inatambua nafasi ya TEHAMA katika kufikia malengo ya Taifa na hivyo kuisisitiza juu ya matumizi sahihi ya TEHAMA katika utekelezaji wa shughuli za Serikali na utoaji wa huduma kwa umma. Pamoja na mambo mengine, Sera ya Taifa ya TEHAMA ya Mwaka 2016, inasisitiza juu ya Serikali kutumia fursa zitokanazo na TEHAMA pamoja na matumizi sahihi na yenye tija ya Mifumo ya TEHAMA, katika kuboresha utendaji kazi wa Taasisi unaosaidia kutatua changamoto za kiutendaji, kudhibiti makusanyo ya mapato ya Serikali, kujenga na kuboresha uwezo, pamoja na kuimarisha mawasiliano miongoni mwa wadau wa Serikali Mtandao.

### **Ndugu Wageni Waalikwa,**

Ili kuhakikisha TEHAMA inatoa matokeo tarajiwa, jitihada mbalimbali zimefanyika katika maeneo ya Sera, Sheria, Kanuni, Miongozo na Viwango vya Serikali

Mtandao, ambazo zimesaidia katika kusanifu, kujenga, kusakinisha na kuendesha Mifumo na Miundombinu ya Serikali Mtandao katika Taasisi za Umma.

**Ndugu wageni waalikwa,**

Tumekusanyika hapa kwa lengo la kukabidhi Mfumo wa Kieletroni wa Usimamamizi wa Kesi, ambao unatambulika kama '**Case Management Information System**' (CMIS), pamoja na **Tovuti ya Ofisi ya Taifa ya Mashtaka** iliyosanifiwa na kujengwa na Mamlaka ya Serikali Mtandao (e-GA), kwa kushirikiana na Ofisi ya Taifa ya Mashtaka (NPS) kwa kuzingatia sheria, kanuni, viwango na miongozo iliidhinishwa.

Lengo kuu la Mfumo wa **CMIS** ni kurahisisha utendaji kazi wa **Ofisi ya Taifa ya Mashtaka (NPS)** katika kushughulikia kesi mbalimbali, usimamizi wa uendeshaji wa kesi za jinai, ambao utaweka uwazi na kupunguza malalamiko kwa wananchi, juu ya maamuzi mbalimbali yanayotolewa na **Mahakama**. Aidha, Tovuti ya Taifa ya Mashtaka imejengwa kwa lengo la kusaidia utoaji wa taarifa sahihi kwa wananchi zinazohuasiana na shughuli za **Ofisi ya Taifa ya Mashtaka (NPS)**.

**Ndugu wageni waalikwa,**

Nimejulishwa kuwa, mpaka sasa zaidi ya kesi za jinai **17,411** zimeshasajiliwa katika mfumo huu ambapo kati ya kesi hizo, kesi **7,361** zimeshafika mwisho na kutolewa hukumu na kesi **10,050** zipo katika hatua mbalimbali za maamuzi. Kiukweli, haya ni mafanikio makubwa katika kuboresha utendaji kazi wa **Ofisi ya**

**Taifa ya Mashtaka (NPS)**, lakini pia ni mfano wa kuigwa na taasisi nyingine za umma zinazohusika na utoaji wa huduma kwa umma.

**Ndugu wageni waalikwa,**

Napenda kutumia fursa hii kuziasa Taasisi nyingine za Umma ambazo bado zina kiwango kidogo cha utekelezaji wa jitihada za Serikali Mtandao kuongeza juhudi katika matumizi ya TEHAMA katika utekelezaji wa majukumu yao kama jinsi Sheria ya Serikali Mtandao ya Mwaka 2019 inavyoelekeza. Ni wajibu wenu kuweka jitihada za Makusudi ili kuhakikisha kuwa mnafaidika na fursa zitokanazo na matumizi ya TEHAMA ili kuongeza ufanisi na kuboresha utoaji wa huduma kwa wananchi lakini pia kutimiza azma ya Serikali ya awamu ya Sita inayoongozwa na **Dkt. Samia Suluhu Hassan, Rais wa Jamhuri ya Muungano wa Tanzania** ya kuwa na Serikali na Kidijiti.

**Ndugu Wageni Waalikwa,**

Niwakumbushe kuwa, **Rais wa Jumhuri ya Muungano wa Tanzania, Mhe. Dkt. Samia Suluhu Hassan**, ameelekeza juu ya kujiimarisha katika matumizi sahihi ya TEHAMA ili tuweze kwenda sambamba na Dunia, hususan katika kipindi hiki cha Mapinduzi ya Nne ya Viwanda, ambayo yanaongozwa na TEHAMA kwa kuwa shughuli nyingi duniani zikiwemo zile za kiuchumi zinafanyika kwa kutumia TEHAMA. Hii inamaanisha kuwa, TEHAMA ndiyo nyenzo muhimu ya kuwezesha upatikanaji na uwasilishaji wa taarifa kwa kutumia zana, mifumo na miundombinu mbalimbali.

**Ndugu Wageni Waalikwa,**

Mfumo huu umekwishaunganishwa kwenye mfumo mkuu wa Serikali wa kuwezesha mifumo kubadilishana taarifa (GovESB), na umeshaanza kubadilishana taarifa na mifumo ya baadhi ya Taasisi za Haki jinai, POLISI, TAKUKURU, na MAHAKAMA. Hii ni katika kutekeleza maelekezo ya Mhe. Rais Samia Suluhu Hasan kuhusu mifumo ya serikali kubadilishana taarifa.

**Ndugu wageni waalikwa,**

Serikali kupitia Ofisi ya Rais, Menejimenti ya Utumishi wa Umma na Utawala Bora itaendelea kuweka mazingira wezeshi ya kisera na kisheria yatakayoiwezesha e-GA kuendelea kutekeleza jitihada hizo za Serikali Mtandao kwa ufanisi zaidi. Hivyo basi, ni jukumu la e-GA kuendelea na tafiti mbalimbali ili kuleta bunifu za Mifumo ya TEHAMA itakayoliwezesha taifa kufanikiwa kuimarisha sekta mbalimbali ili kufikia uchumi wa kidijiti.

**Ndugu Wageni Waalikwa,**

Baada ya kusema hayo naomba kuhitimisha kwa kuwashukuru tena wote mliohudhuria tukio hili na kuukabidhi Rasmi Mfumo wa Kieletroni wa Usimamamizi wa Kesi ujulikanao kama '**Case Management Information System**' (CMIS) pamoja na Tovuti ya Ofisi ya Taifa ya Mashtaka kwa Mhe. Pauline Philipo Gekul (Mb) Naibu Waziri Katiba na Sheria.

***Asanteni sana kwa kunisikiliza***

